

Jeju Na Mehkwỳ Jakrã Cunea Wỳr

MAM PETRÔ JÕ KÀHHÔC

Ỡhỹ, pê Petrô pê Jeju jarkwa na memprar catêjênô. Ne pê mam cupê teppro catê. Pê Jeju cupê ihkôt ipa catê na ahna ahwỳ. Ne còjkwa wỳr Jeju jàpir jirô pê mã ri, cupê Krĩpinkrên kam Jeju na mehkwỳ mehkrĩatajê to ihhimpej catêjê nõ. Ne pom cu me hõ kàhhôc pijakrut cahyt ita, pjê cunea kam Jeju na mehkwỳ te me amji pupun to kêanre atajê mã pê ihhôc ne kujate. Na pê hõ kàhhôc ita japyr pê **Jeju Na Mehkwỳ Jakrã Cunea Wỳr, Mam Petrô Jõ Kàhhôc** (1 Petrô). Nepahte me amji pupun xà kêanre ita te me pamã pahte amji kam me pajapac xà to imej, ne to me pamã hahkre.

Pê Petrô me cumã amji jarẽ

Jowãw 1.40-42; Me Hàpên Xà 1.15; 10.1-48

¹ Hàpà me ikwỳ pê Pahpãm na mehkwỳ! Ipê Petrô, pê Jeju Crixtojarkwa na iprar catê. Por jũm te me gõ pjê intêteame acràn, ca jũ ri ame akrĩ atajê mã, wa ite apu ihkàhhôc itajê ton. Ne wa ha maPonto jõ pjê me, Carati jõ pjê me, Cawrôpejti jõ pjê me, Axij jõ pjê me, Pitin jõ pjêwỳr, me awỳr apu ihkujahêc pa.

Pê Pahpãm me pahcapi

Ruc 12.32-34; Roman 8.18-25

² Pê Pahpãm pê me pajõ Inxũ Cati ramã cute amji mã me pahcapi xà na amji kampa. Na pê amji mã me pahcapi, ne me pamã Carõ Pejti gõ, mâr cu mepapê mehkwy imej pit, ne catyt kam, Pahpãm kôt me papa. Ne mër ampo na mã cute me pahto hajÿr? Nee mãampo na nare, mâr cu xwy mã ampeaj kam, amji mã me ihkra pê Jeju Cixtô kam me pajapac pejti ne. Ne me pajaxà kam ihtyc xà ata pê ri ihhêj rûm cute caprô to me pahkên pê me pahcuhhôn, ne me pahto imej. Ne me pahto imej xà caxuw ri, cute amji mã me pahcapi. Ne wa ijõtpê Pahpãm mã me acajrën to hane he:

— Ỳhÿ, Inxũ Cati, ca ha me pahkwÿ atajê mã, ate amji kam gapac xàa na, me to imejti to apa. Ne me caxwãm pê me cumã acarïcti gõ, mâr ca, cute nee me amji mã ampo cupa nare ata to, me cumã apicamën to mõ, mâr quê nee ame hÿpa nare — hane.

Pê Pahpãm ramã me pamã ampo pej jàhtôa ne to ahcuprõ

³⁻⁴ Cu ha Pahpãm pê me pajõ Pahhiti pê JejuCixtô Pãm mã, hÿrën mepajakryti na me amji jarê. Ne ampeaj kam ri cute me papê mehkwy to imej to imejti xà ita te hajÿr he. Cute me pahcaprÿ to catia, na ri cute mepamã pahte amji kam me pajapac xà tuwti pejti jõr, na ri me papê mehkra. Ne hanea ne cute hacpÿa mã ihcãmter pê Jeju Cixtô to ihtÿr xà ata kôt ri, cute me pamã pahte amji kam me pajapac xà tuw jõr, mâr cu cahê na me pahkrÿ rohnÿttimã. Ne ramã Pahpãm te cõjkwa kam, me pamã ampo pejti te

me pahto impejti xà ata jàhtôa ne nõr. Ne ihtỳj ma me pamã hamã, mãr quê nee jũcaxuw me papê carôt hamre, ne ihkên ne ihcacu, ne ipictor nare. Ne cu ha pahtỳj cute me pahto hajỹr xà ata to, amjimã me to hajỹar kam me hikaj.

⁵ Ne pahte me Jeju to amji mã pahhimpej xà ita kôt ri, cute me pamã ampo pejti itajê cunea jõr itajê pê, me pahtekjêa ri. Cwỳrjapê quê ha Pahpãm me pajamãr ita na, quê ha ahnaa jũ caxuw, pjê jamre xàata kam, amji carôat kôt amji mã me pajuwahi.

Pahpãm te me pahcajpěr prãmte ame pahto kên

⁶ Ampo pej itajê pyrên, ca ha me gakrya ne. Ne amcro itajêa kam, ca cormã ate me amji pupun xà kêanre to me amji pupun to me apa na, hõtpê me anaamcro wênre, na ri me amã amji kãn nare.

⁷ Ne měr ampo na mã ampo kên itajê ame ato hane? Nee mã ampo na nare. Cute me acapi, ne ahna me acajpěr prãmte ri ame ato hane. Na wa ha itacaxuw me amã kên prà tepti japrỳ te ôr ata te amji kam hapac xà kôt harê. He hũhhi na hê xà ton xà caxuw, quê ha xa cute ton catê ata, cute wakỳre prà tepti pê ôr ata capi prãmte, cuhy kam cuxi. Quê ha ajgã, neihhorhot, quê ha hõmpu, xà ajkĩ ampeaj kam ri cupê ôar to ôr. Nãmri quê ha cupê wakỳre prà tepti nare na, quê ha ihcunea capa. Nãmri quê ha cupê wakỳre prà teptia na, quê ha ihhorhot, ne kam ampo kên itajê pit capa, ne ihcahhur ahtwỳ ata pê, quê ha wakỳre prà tepti pê ôar to ôr, ne ampeaj kam impej, ne ahna hĩ ahwỳ. Ita jĩkjê

na mã, me apê wakÿre prà tepti ita pyràac, ne ate me amji pupun xà kèanre itajê pê ihhêjrũm, cute cuhy kam me wakÿre prà tepti nør pyràac, cute me apupun, ne me gahkre pej xà na. Ne quê ihhêaj to cormã me ate amji kam me gapac xà kamampo kèanre na, quê ha me ate amji pupun xà itajêa kôt, me apê me akên itajê to pøj partu ne. Ne wakÿre prà tepti itajê ampeaj kam ahna hĩ jàhwÿr cakrô, quê ha ihtÿj hamre to mō, ne ihtÿj jũ caxuw hamre. Ne Jeju toquêt ate amji mã me ahimpej xà ata ri, kên prà ata jirôa pê impej, ne neejũ caxuw me apê hamre xà nare. Na quê ha amcro nōna, Pahpãm Jeju Crixto to ajpê, quê ha mehcunea ampeaj kam cupê ampo cunea jō Pahhiti na hahkre pej. Ne amcro ata kam, quê ha Pahpãm me amã:

— Ca ate me amji pupun xà to kèanre itajê kôt ri, ita caxuw ampeaj kam me apej — hajÿr xà ata kôt, quê ha mehcunea ihtÿj amji mã me acupa, ne me apejti jàhcujrohti na me apupu.

Pahte me amji pupun xà kèanre xà ita kam, cu ha pahtÿj ame pajakry

⁸ Cormã nee ate me Jeju pupun nare cakrô, ca ha atÿj me amã ihkĩnti kam me apa. Ne nee cormã ita kam, ate me hõmpun nare cakrô, ca ha atÿj amji mã me to ahimpej to me apa. Ne hũrên ca ha me amã amji kĩanto amji kĩn catia to cati, ne nee me amã me gakryti ita kôt harên xà hamreare, ne cupê cōjkwa kam amehkrĩ atajê jakryti pyràac.

⁹ Ne mër ampo na mã me amã amji kĩn? He nee mã ampo na me amã amji kĩn nare! He Jeju

ihýtj ampo kên catia ata pê me acaxwÿn pytâr to ipa, ne hÿrên ca ame gakry. Ca Jeju to amji mã me ahimpej to me apa xà atakôt ri, cute me apytâr, na ca ha atÿj jÿ caxuw Pahpãm cahê na me apa rohnÿtti mã.

Pê mam harkwa to mehcakôc catêjê nee ih-cunea na me hahkre pej nare

¹⁰⁻¹¹ Pê ramã rÿ pêa mã Pahpãm jarkwa to mehcakôc catêjê me cumã amjia kôt, me pahkên pê me pahcunea pytâr catê ata kujahêc na, me cumã harê. Pê Crixto Carô Pejti me caxwãm pê me cumã acjêj, ne ajco me cumã cator xà ata jarê. Ne hanea ne me cumã, por quê ha Crixto cute amji pupun xàkêanre to amji pupun xà ata jakàn pê, quê ha Hÿm hacpÿa mã to ihtÿr, ne hipêr to cati, ne to impej na, me caxwãm pê me cumã harê. Mã cute me hahkre pej prãmte, amji mã mehprÿa, ne ihtÿj me to hahkre to me mō. Ne ihtÿj me ahna hàhcukjêr to me mō, jÿ caxuw mã quê ha cato, nejÿ mã quê ha cator xà ita.

¹² Ne pê Pahpãm cute me cumã harkwa to mehcakôc catêjê mã, ampo itajê to hahkre xà ata kam, hanea ne cute me to pit mã, impejti xà caxuw, me cumãharên nare. Ne pom ca ita kam ame kampa atajê to, cute impejti xà caxuw riame cumã harê. Ne côjkwa pÿn, Pahpãm Carô Pejti carôat kôt Jeju pê me pahpytâr catê na, me hÿjarên pejti jarên to memprar catêjê te, ramãampo itajê cunea to me amã hÿjarên. He côjkwa kam Pahpãm mã memprar catêjê te me hajÿar, ne tee ame hahkre pej to prãm.

Pê ajteare mã Pahpãm, ne impej, na cu ha cuxà me pampej pit

2 Petrô 3.10-13; 1 Jowãw 3.1-6

¹³ Cwÿrjapê ca ha me akrã kam, ate Pahpãm jarkwa kam me gapac xà caxuw me amji to gâhcuprõnhiahpuro, ne me guphêa rûm ate amji kam me gapac xà to amji kam gapac tome apa. Ne Pahpãm te Jeju Crixto to ipipê xà me, cuteme ato impejti xà itana, ca ha atÿj me hikaj to me acrà rohnÿtti mã.

¹⁴ Ca ha atÿj Pahpãm kam me gapac to me apa to hane, pom quê me ahkrare me hũmxwÿ kampa he. Ne nee ca mam ate me amji jahkre kêt kam, ate amji kam me gapac xà kèanre to, ate amji kam gapac to me apa xà ata to, hacpÿ mã me amji kam gapac, ne ihkôt me apa nare.

¹⁵ Mã Pahpãm pejti pê catyt kam ipa catê ata te me ato ihkra xà na, me ana hàhwÿr. Cwÿrjapê ca ha Pahpãm cuxà me apê ampo cunea kam, catyt kam me apa catêjê, ne nee ampo kên crire nõ to, me amji kam gapac nare.

¹⁶ Ampo na? He pê ramã Mojxe xwÿ Pahpãm jarkwa na, hõ kàhhôc kam mehkwy na ihhôt to hane he:

“He ipê me amã catyt kam ipa catê,
ne wa ajteare mã, ne ipejti.
Cwÿrjapê ca ha hanea ne,
icuxà me apê ajteare mã,
ne catyt kam me apa,
ne me apejti ne” hane.

17 Ca ha me Pahpãm mã acakôc, ne mehcukij to:

— Me ijõ Inxũ Cati — hane. Ne cormã cõjkwa kaj naame apa xà ata kam, ca ha atỳj amji mã me Apãm ita cupahti ne. Ampo na? He quê ha ihtỳj jũ caxuwme pahcunea cukij, ne me pahte me ampo cunea to me pajàpên xà atajê jahpan xà na, me pamã amgõ. Ne catyt kam me pajàpên xàa kôt me pamãamgõ. Ne pahte me pajàpên xà impejti ton catêjê, cu ha impejti to me amcwa. Ne pahte me pajàpên xà kêanre to me pajàpên catêjê, cu ha ihkêanre to me amcwa.

Jeju te caprô to me pahna hãmjõr

18 Pê mam me panquêtjê te amji kam me hapac xà kôthamreare atajê kôt pit mã ajco ame papa. Ata jahpan xà na ri ihhêj ne Jeju jãmjõr. Ne cute amji kam me pajapac xà kêanre ata pê me pahto cator. He xà ajkĩ hãmjõr xà ita pê ihpore, nare, cupê wakỳre prà tepti pê ôr na hĩ jàhwỳrti ata? Nare cupê wakỳre prà jakati na hĩjàhwỳrti, mã hanea ne ramã cama hamre to mõi ata pyràac?

19 Hãpà, nee cupê ampo itajê nõi nare. Cute me pahna ampo cunea jirôa pê caprô na hĩ jàhwỳrtiata jaxwỳr, ne toa ri cute ihhêj ne me pajũhkàr. Pê mamme panquêtjê amji jaxà kam me carà cahàcre hôhti kra capênti atajê to me amji kritxwỳ, nemehkên atajê jahpan xà na mehcura. Ata pyràc pej na mã Jeju Crixto te amji kam hapac xà capênti, ne cupê carà cahàcre hôhti kra nõcapênti ata pyràac, ne cute me pahna caprô na hĩjàhwỳrti ata jaxwỳr, ne cute caprô jaxwỳr xà ata pê ri me pahkritxwỳ pyràac.

20 Pê Pahpãm cute pjê ton xwỳjre na, ramã me pahkritxwỳ na Jeju capi ne hãm. Ne curmã ri amcro itajê nõ kam, cute me amã ihkra te ihcunea na me ato impej partu xà caxuw ri, me amã to ipipê.

21 Pê Pahpãm hacpỹa mã to ihtĩr, ne ma cõjkwa wỳr to api, ne to cati, ne ampo cunea jipy hãm, ne toimpej. Ne Jejua kõt ri, ate amji mã me Pahpãm to me hajỹr xà ata to, kypê amji mã me ahimpej to me apa nare. Na ca ha atỳj jũ caxuw cute meato impejti xà ita na, me hikaj.

Pê Pahpãm jarkwa pahte amji kam me pajapac xà cuhhõ

Ruc 8.11-15; 2 Timot 3.14-17; 1 Jowãw 3.14-17

22 Ne ca ramã ita caxuw Pahpãm jarkwa pejti, hêj xi nare kam me gapac pejti to me apa. Ne ramã ihkõt hanea ne ate amji kam me gapac xà cunea toihtetetti ne me to impej. Ne ca ramã Jeju kõt ate me ajpẽn to me akjêjê atajê me, ca ramã ame ajpẽn kĩnti to me apa. Cwỳrjapê, ca ha me amã ajpẽn kĩnti ita na, me amã ajpẽn kĩn prãam kam ame ajpẽn kĩn.

23 Ne por pê cu me pahcunea me panxyrxwỳ pĩn ame pajapøj atajê, quê ha ihtỳjame ty, na cu ha hanea ne pahtỳj ame ty. Ne Pahpãm nare. Quê ha Pahpãm harkwa tĩar rohnỳtti mã ata kõt, jũm mã cute amji kam hapac xátuw jõr na, quê ha cupê hacpỹa mãihpỳm ata pyrãac, ne nee jũ caxuw caxwỳn ihtyc nare. Quê ha cupê Pahpãm tĩr rohnỳtti mã ata kra, ne nee cupê me panxyrxwỳ tyc atajê pyrãc, ne ihtyc nare.

24 Ne pê ramã Ixaj xwỳ Pahpãm jarkwa na, hõ kàhhôc kam, me ahna ihhôc to hane he:

“He pjê kam ame pahcunea ame papa itajê pê ihhêj rûm ahtu pyràac,
ne pahte amji kam me pajapac xàitajê pê pĩrã pyràac.

Ne quê ha jũ caxuw ihtỳj ahtu ata incrà,
quê ha hanea ne pĩrã ata incrà, neihpỳm.
Ata jĩkjê na mã me pahcunea te me hajỳr pit,
na cu ha pahtỳj ame ty ne me pajamre,
quê ha pahte amji kam me pajapac xà cunea
hamre tu ne.

25 Ne me pajõ Pahhiti jarkwa te nee hajỳr nare,
ne quêt hikwa rohnỳtti mã,
ne nee jũ caxuw ihkên,
ne ihkôt hamre xà nare” hane.

Ne harkwa hikwa rohnỳtti mã ata to pê Jeju pê me pahpytâr catê jarkwa na memprar catêjê me amã harê.

2

Cu ha Pahpãm te amji kam hapac xà na me ahcukij

Epet 2.19-22

1 Cwỳrjapê, cu ha nee hipêr Pahpãm jarkwa pejti ata jirô pê ame pahpỳpỳm, ne ame ampo kên ton to me papa nare. Ne cu ha nee me pahhêj xi jarên nare. Ne cu ha aracri me cupê to me papimxur pej pêa mã, hipêr me ampo kên tonnare. Ne cu ha nee me hũ na ame amji to prãm nare, ne nee ame hũn to me papa nare.

² Ne curmã me ahkrare kwỳ pỳpỳm atajê mã ihtỳj menxyrxwỳ kà xen, mã me cacô to pijahô, ne mehkà cacô ata to ihtỳj me ipicamẽn to memõ. Ita jĩkjê na mã, me ate me hajỹar. Na ca Pahpãm mã ihhêj ne curmã ame apỳpỳm, ne cormã kyre pê amji mã me to ahimpej to me apa. Ne Pahpãm jarkwa ata pêihhêj rũm mehkà cacô pyràcti, na quê ha me amã hãan to hãn. Ne harkwa kôt me apa xà ata pê ihhêj rũm mehkà cacô to ate ame pijahôr xà, naquê ha ihtỳj me ato ipicamẽn to mõ. Na ca ha atỳj jũ caxuw ampo cunea na Jeju kôt me apa.

³ Pê Tawi xwỳ ramã Pahpãm jarkwa kôt, hõ kàhhôc kam, ate me hajỹrjê na ihhóc to hane he:

“Ate ramã me pajõ Pahhiti te me ato impejti xà ita cajpěr,
ne me hahkre pej” hane.

Jeju me, me papê mehkwỳ pê Pahpãm jũrkwa pyràac

⁴ Ne ikre pyxwỳr catêjê pej, hãn ne ikre caxuw, me hicjêcti pej pit capi, ne hanea ne me ihhê kwỳ cunea impej pit capi. Nare, quê ha me cumã kẽn to ikre xãm prãm na, quê ha me cumã kẽn cuhtac nõimpejti xi, hõxwahhi kam, ne ikre cahhur caxuw quê ha hanea ne kẽn pej pit capi ne to cuprõ. Jĩkjê na mãPahpãm pê cute me ikre pyxwỳr catêjê atajê pyràac, ne mehkwỳ caxuw cute me acapi, ne Jeju na me ato cuprõn. Ita na mã me cupê ikre pyxwỳrcatêjê te amji jahkre kêatre atajê, ma apu amji pê pĩ jicjêc pejti ata

caca, ne cute me mên. Jĩkjê na mã me cupê Ixaher catêjê jõ pahhi kwỳ, ma ame amji pê Jeju caca. Mã quêt Pahpãm te cupê mehwỳjõ Pahhiti pê ihcunea na hãmkrã jàmterà cati ata capi.

⁵ Ne hanea ne ikre pyxwỳr catêjê pej te amji mã pĩ pej me, kên pej pit capi, ata jĩkjê na mã Pahpãm te, cute me ato amji kwỳ xà caxuw meacapi. Cwỳrjapê ca ha cama amji na me hamã, quê ha me ato amji kwỳ peaj, ne mār quê me akôt me hàhtôa ne me Pahpãm jahkre pej. Na ca ha me apê, por mam Pahpãm te amji kam hapac xà jũrkwa na kên kwỳ ata pyràac. Ne me apê, por mam mecupê Pahpãm mã mehcajrên catêjê atajê pyràac, necute ihcajpuaw prãmte atỳj Pahpãm mã ihcunea na catyt kam me apa, ne cumã me apê. Mār ca Jeju Crixto kôt, Pahpãm mã me ampo pej pit tonto me apa, quê ha ihtỳj Pahpãm, ate me cumã ampo pej pit ton xà atajê na, amji capa.

⁶ Ne quê ha ikre pyxwỳr catêjê itajê kên to pit mã me ikre nõ xãm, ne cute me cumã pĩ jicjêc nõ xãm xà kaj na, hõxwahhi kam, me cumã kên nõ tỳjti cuhtacti ata nõ xi. Ita na pê Ixaj xwỳ ata, ramã hõ kàhhôc kam, Pahpãm jarkwa na, me ahna ihhôc to hane he:

“Wa ite amji mã kên nõ tỳjti cuhtacti na hĩ
jàhwỳrti ita capi,
ne wa ha Xijãw jõ kêncahê na,
Krĩpinkrên kam me ikwỳ mehkri atajê kam,
me hipôc ri cuxi.

Ne por kên ata quê ha cupê mam ikre caxuw kên
 ata,
 ne ampeaj kam ihkwỳ jirôa pê impej ne ihcuhtac.
 Ne quê ha mehwỳ te amji mã me to ihmipej
 na,
 quê haihtỳj mempej mã mehpỳm,
 ne ampeaj kam hūrên me hakry,
 ne nee jũ caxuw hũ na amehpahàm nare” hane.

⁷ Ca ate Jeju to amji mã me ahimpej atajê mã
 ri, cupê mam kên pejti, cuhtacti nahĩ jàhwỳrti
 ata pyràac. Ne nee Jeju to amji mã mehhimpej
 nare atajê mã ri, cupê kên kôt hamreare ata
 pyràac. Ne pê ramã jũm ita Pahpãmjarkwa na,
 hõ kàhhôc kam ahna ihhôc to hane he:

“Pom ikre to me hàpên catêjê,
 ma ame ikre mã hãm xà caxuw kên pejti caca ita
 te ihkwỳ jirôa pêamji to cati,
 ne ihcuhtacti ne ihtỳj” hane.

⁸ Pê Ixaj xwỳ Pahpãm jarkwa na, hõ kàhhôc
 kam, Jeju na ihhôc to hane he:

“Quê ha pry kam cupê kënti nã pyràac ne jỹ,
 ne pry kôt me pra atajêjàhtôa ne mehtôtôc,
 quê ha me ajhu” hane.

Hõhõ, cute me to hajỹr xà itakam, quê ha me
 hàhtôa mã Jeju kĩn nare, quê ha maamehcaca.
 Ne cupê me hũtâr catê na me harên xà ata to, quê
 ha nee me amji mã hajỹr nare, na quê ha ma ame
 harên par caca. Ne por quê ha ma ame harênpar

caca atajê te ramã amji kên mã me amji mên. Ne pê ramã Pahpãm cute me to amji kam me hapac xà ita na, me to amji kampa.

⁹ Ne nee pahte me hajÿr nare. He pê Pahpãm amji mã me pahcapi, me papê me pajõ Pahhiti pê Pahpãm mã pahte mehkwy cajnê catêjêna. Ne me papê mehkwy pê hõ tekjêa ne me pam-pejti. Mã Pahpãm te ihhêj ne awcapatkôti kam ampokên ata pê, hàhcujrohti ata wÿr me pahna hàhwÿr, mãr cu pahtÿj me ampo pejti pupu, ne me to. Ne me pahte mehcunea mã Pahpãm te ampo pejti catia ton atajê jarên xà caxuw ri, cute me pahna hàhwÿr.

¹⁰ He pê mam, nee me apê Pahpãm na mehkwy pê me hõ tekjê nare, ne ita caxuw ri meapê hõ tekjêa. Ne mam nee me amã Pahpãm jàhcaprĩ ita na hahkre pej nare, ne ita caxuw ri ihtÿj me acaprĩ.

*Cu ha ampo pej pit ton to me papa
Roman 13.1-7; Tito 3.1*

¹¹ Ýhÿ, imã me akĩnti atajê, por me acahkrit, ca me gõ pjê kaj na, ampÿa mã ame hõ pjê kam ameakrĩ atajê. He me pahcunea te me hajÿr pit. Ampo na? Cõjkwa kam ri quêt me pahcunea krĩ xà. Cwÿrjapê wa Jeju kam me pahte ajpên to me pahkjêjê itajê, wa ha me awÿ, ca nee pjê ita kam ame pahkrĩ rohnÿttimã na, ame to amji kam me gapac nare. Cwÿrjapê wa ha me ana ijàhwÿr to hane he:

— Ca ha nee ate amji kam me gapac xà tũm kên atajê kôt ame apa nare — hane. Ampo na? Ca ha atÿj me pajĩ te ampo kêanre ton na

prãmti xà ata tonto ame apa. He ihtỳj pahte me amji kam me pajapac xà tũm kên ita, ihtỳj me pahcaxwỳn me, me ajpẽn kujtê.

¹² Na ca ha mehcahkrit pê Jeju to amjimã me hajỹr nare atajê cahê na ame apaxà ata kam, ca ha catyt kam ame apa. Ampo na? Quê ha ate ampo pej pit ton to me apa na me apupun cakrô, ihtỳj me akôt harẽn xà kêanre to ame akôt harê, ne amji caxwãm pê ame ato ihhêj na, me amjihakre pej. Ne quê ha jũ caxuw me Pahpãm te amji jaxàr xà ata jõ amcro kam ahtwỳ, quê ha cato, quê ha hanea ne, por cute me akôt harẽn xàkêanre atajê, ihtỳj amji kên na me amji jahkre pej, neme Pahpãm pejti na cumã me harê.

Cu ha pjê jõ pahhi catêjê kampa

¹³ Ca ha nee me pajõ Pahhitia mã ihpahàm cator nare. Pê ihtỳj amji mã Hũm cupa to ipa, na ca ha atỳj amji mã me cupê pahhi catêjê cupa. Ne ca ha Roman jõ krĩ kam, amji mã me krĩ cunea jõpahhiti pê Xexa ata cupa, por cupê ita ri pjê kam pahhi catia ata.

¹⁴ Ne ca ha hanea ne por harkwa kôt, krĩ cunea kôt me cupê pahhi atajê, ca ha amji mã me hũpa. Ampo na? He cutea ri krĩ cunea kôt, cuteame ampo kêanre ton atajê jahpan xà na, ame to kên xà caxuw me cumã harkwa. Ne hanea ne cutea ri, cute catyt kam ame ampo pejti ton catêjê namehcakôc to impejti na harkwa.

¹⁵ Ne mễr ampo na mã ca ha catyt kam ame apa to hane? He Pahpãm mã, cute me amji jahkre kêatre catêjê te ihtỳj ame ana mehcahông

kêanre to me ipa ata tète, cumã mehcahpêrhyr prãm. Na ca ha catyt kam me apa.

¹⁶ Pahpãm te ramã ate amji kam me gapac xà kên itajê cunea pê me ato cator, na ca ha atÿj catyt kam ame apa, ne ame ampo pej pit ton to meapa. Ne nee ca ha me anõ amji mã:

— Jezu te, ite nee ampo kên ton nare xà caxuw imã carôt jôr. Cwÿrjapê wa nee hipêr ampo kên ton to ipa to prãmnare — hajÿr cakrô, mãnea mã ampo kên ton kam to acrà nare. Cwÿrjapê ca ha neehipêr ampo kên atajê to ame amji mã me ahimpej, quê me ato ihhimpej nare, ne Pahpãm to, ca ha quêt amji mã me ahimpej. Mâr quê cupêa me gõ Pahhiti.

¹⁷ Ca ha amji mã mehcunea cupa to me apa, ne hanea ne amji mã me Xexa pê pjê jõ pahhiata cupa. Ne quê ha amã Jezu kam, ate me ajpên to me akjêjê atajê kîn. Ne me hirôa pê amji mã me Pahpãm cupahti to me apa.

Cu ha amji mã me pahcaprĩa, ne pahtÿj ampo kên cunea mã awcanã

Epet 6.5-8; Coroxo 3.22-25; 1 Timot 6.1-2; Tito 2.9-10

¹⁸ Ne me amã me gõ pahhi, ca cama me cumã me apê atajê, ca ha atÿj me kampa, ne amji mã me hũpa to me apa. Ne nee ca amji mã me gõ pahhi te meato impejti, ne me gamãr to me ipa atajê pit cupa nare, ne hanea ne cute ame ato amji kam hapac xàto kêanre atajê, ca ha atÿj hanea ne me kampa, ne amji mã me hũpa.

¹⁹ Ca ha me gõ pahhi to impejti cakrô, quê ampo na ame ato kêanre, ca ha nee amji jahpan

xà na me acakôc nare. Ca ha amji pupun xà kêanre to amji pupun cakrô, nee amji jahpan xà na cumã garkwa nõ to me acakôc kên nare, ne atỳj me cumã awcanã. Ampo na? He Pahpãam kôt ca ate to hajỳr, cwỳrjapê quê ha me apyrên Pahpãm hakry, ne taa ihtỳj me ato impej.

²⁰ Ca ha ate ampo to kên to apa na, quê ha hahpan xà na, ate amji pupun xà kêanre nõ akam ihpỳm ne acahhy, ca ha aracri jỳ ne cumã awcanã, quê haahna ajkĩ Pahpãm mã apejti ne, ne cumã acaprĩ? Hãpà, atea ca amji caxuw ita ton, na ca ha atỳj cumã awcanã, ne aracri jỳ. Ca ha ate ampo pejti ton to apa cakrô, quê ha hahpan xà na ate amji pupun xàkêanre nõ awỳr cato, ca ha cumã awcanã, quê ha Pahpãm apupu, ne ihtỳj apyrên hakry ne ato impej.

²¹ Me pampejti ton to me papa jahpan xà na, me pahte me amji pupun xà kêanre mã me pajũcanãr xà. Ne caxuaw ri, Pahpãm te me pahna hàhwỳr. Ahnaa mã pê Jeju mepamã to hahkre xà caxuw me pahcumam, cute me pancwỳrjapê amji pupun he. Na cu ha ihkôat me hane.

²² Pê Ixaj xwỳ Pahpãm jarkwa na, hõ kàhhôc kam, ahna ihhôc to hane he:

“Ne nee jũ caxuw me pajõ Pahhiti te ampo kên ton nare,
ne nee ihcakôc xà nõ to ihhêj xi nare” hane.

²³ Pê ame cumãn kêanre cakrô, pê nee amji jahpan xà na, jũm mã harkwa nõ kên to ihcakôc nare. Pê ame to kêanre, ne me cumã ihkàjxà

ton cakrô, pê nee me to kên ata jahpan xà na, me cumã amji cawpa nare, ne aracri ihcuhê. Ne cute cama ihcunea na Hũm mã amji jõr, mãr quêtaa, jũ caxuw, catyt kam, ampo itajê cunea to impej. Ne quê ha jũ caxuw mempej catêjê to impej, ne mehkêanre catêjê kên mã me curẽ.

Pê Jeju kà caxõ xà ata me pahcunea to impej

²⁴ Ne Jeju te amjia kôt, cute mehcuran xà ita mã amji jõr, mã cute pĩ kam mehcuran. Ne me ate amji kam me gapac xà kêanre itajê mea mã, ihhêj ne ramã cute pĩ ata na menxôr, mã ihtyc, ne hamre. Na ri nee hipêr meate amji kam me gapac xà kêanre atajê kôt ame apa xà nare. Ne quêt Pahpãm te amji kam hapac xà impejti ata kôt ri ame apa xà. Ne cute ameJeju kà to caxõ xà ata te ri me amã ate amji kam megapac xà mã ampej.

²⁵ He carà cahàcre hôhti pry cupa, mã hamãr catêjê ame hapêê, ne hacpỹa mã me to cuprõ, ne ma me hamã, ita jĩkjê na mã, mam me acaxwýnpictor, ne Pahpãm pê ampỹa mã apu ipa. Ne Jeju Crixto te hacpỹa ne amji wýr me acaxwýn to cuprõn, ne ita caxuw ma me gamã, ne ihtýj ampo kên pê me apytà.

3

Quê ha pyjê ihtýj amji mã mempjê cupa

Epet 5.22-25; Coroxo 3.18-19; 1 Timot 2.9-15

¹⁻² Ita caxuw, wa ha me apê pyjê mã mempjê atajê japackre. Quê ihhêaj to me akwý mã me apjê kwý te Pahpãm jarkwa kam me hapac nare atajê, ca haatýj Pahpãm wýr me to apipkjêr to

hane he. Ca ha me cumã, cute amji mã me hũpar xà caxuw me cumã acakôc nare kam, ate amji kôat catyt kam Pahpãm to, cute amji mã mehhimpej na me to, quê amji mã meto ihmimpej. Ca ha me apjê kampa, ne catyt kam ame apa, mâr quê me apjê catyt kam me apa na me apupu, ne ate amji mã me hũpahti na me gahkre pej, ne me akôat Pahpãm wÿr me apkjê, ne amji mã me to ihmimpej to me ipa.

³ Ne nee ca ha me apejti to prãm to, põ rũm pit mã ame amji cũmpej, ne aracri me acaxwãm pê me ate amji kam me gapac xà kêanre, ne imej nare, ita na ihkaj na. Naca ha nee cama ame amji cũmpejti to prãm nare, ne nee camaame akĩ to imejti to prãm to ame to apihho, quê imejti nare. Ne nee ca me gakrô xà peaj to pit mã ame amji jakrô prãm nare, ne nee cama meapejti to prãm to cupêhkà peaj to pit mã me amji kà prãm nare. He Pahpãm mã ampo itajê te me ato imejti itajê kôt hamreare. Ampo na? Quê ha ihtÿj jũ caxuw ampo itajê mea mã, me gĩ ty, ne hamre tu, ne acto.

⁴ Ne quêt me acaxwÿn nare, quê ha nee jũ caxuw ihtyc ne ipictor nare. Na ca ha me acaxwãm pê me acaxwÿn cũmpej. Ne ate amji kam me gapac xà itajê, quê ha nee ampo kam apu incàcàc nare, nequêt amji mã ihprĩa kam, ihcarĩcti kam, catyt kam ipa xà ita ri, quêt Pahpãm mã catia to cati, ne imej.

⁵ He mam me apupxwÿjê te Pahpãm to amji mã mehhimpej, ne ihtÿj curũm me ampo pej jikaj atajê pê ajcome amji cũmpej to me hane he. Pê ajco ihtÿj amji caxuw mempjê kam me hapac to

me ipa. Ne Pahpãm mã cute me hajÿr to ipa xà ita pê ri ihhêj rûm me hakrô xà.

⁶ Ahnaa mã pê Xarakwÿj xwÿ hanea ne, ajco ihtÿj amji mã impjê pê Aprãw xwÿata kam hapac to ipa, ne ajco cumã: “Ijõ pahhi” hane. Ca ha ampo pej pit ton to me apa, ne nee me amã ampo cupa nare na, ca ha me apê Xarakwÿjxwÿ pyrãac, ne me apê me tàmwxÿa.

Quê ha mepjê mã ihtÿj mehprõ kÿn

Roman 12.9-21; 1 Texarõn 5.14-15

⁷ Ne me apê mepjê, ca me aprõ me, me apa atajê mã, wa ha ita caxuw icakôc. He me gapyre mã me aprõ carôt peacre na, ca me to amji japackre, ne amji mã me hÿpa, ne me hamãr peaj to me apa. Ampo na? He quê ha Pahpãm ajwar amji cahê name apa na me ato, ca ha cahê na me atïar na me apa rohnÿtti mã. Hõ, ca ha me to hajÿr to me apa, mãr ca Pahpãm mã me acakôc, quê ihtÿj me akampa, ne nee me apar caca naré.

Cu ha pahtÿj pahte ampo pejti ton na amji to me ahcukij

⁸ Hamre, ita caxuw wa ha me acunea japackre. Quê ha me amã ate amji kam me gapac xà pyxit peaj. Nequê ha me amã ajpën kÿnti hanea, pom quê mehkjêjê mã ajpën kÿn he. Ne hanea ne me amã ajpën caprÿhti ne, ne ajpën to me acati to me apa, ne nee me anõ pyxit peaj ne amji to acati prãm nare.

⁹ Ne quê jÿmjê ame ato kên, ca ha nee amji jahpan xà na ame to kên nare. Ne hanea ne quê jÿmjê ame axÿn, ca ha nee amji jahpan xà

na ame hũn nare. Ne cama amji jahpan xà na, jũmjê atajê to mempejti ne. Me pahte mehcunea to impejti, mã me hahpan xà naPahpãm te me pahto impejti xà caxuw ri, cute me pahna hàhwÿr.

¹⁰ Pê Tawi xwÿ ramã Pahpãm jarkwa kôt, hõ kàhhôc kam, ita na ihhôc to hane he:

“Quê ha me amã amji kĩnti me,
megakryti na me apa to prãm na,
ca ha me hane he:
Ca ha nee jũmjê to ame acakôc kên nare.
Ne nee ame ahêj xi toame acakôc nare.

¹¹ Ne ma ame amji tête ampo kên cunea curê,
ne me akên ton jïcu,
ne me ampo pej pit ton to meapa.
Ne ca ha hanea ne ajpên mã me apejti na me akrĩ
na,
ca ha amji to me ahcukij.
Ne quê jũmjê apu ajpên curê,
ca ha hacpÿa mã ajpên mã me caprĩ na me to.

¹² Ampo na?

He me pajõ Pahhiti mã cute me ampo kên
tonitajê na mehkĩn nare,
mã ma ame curê.
Ne mempejti catêjê ri quêt,
me hamãr to impejti, ne ihtÿj me cumã,
cute mehcajrên xà atajê na me kampa” hane.

*Jũm te pahte amji pupun xà kêanre na me
pahnton xà pyrên me pajakry*

2 Timot 2.24-26

¹³ Ne quê me amã ampo pejti ton to prãmte,
kamme akrã acto tu, ca me ton to me apa xà ata

kam, quê hapijamã Pahpãm kam jũm te ame ato hamre na hamã? Hãpà!

¹⁴ Ca ha ate me ampo pejti ton na, quê ha jũmjê te hahpan xà na, ate me amji pupun xà kèanre na me aton na, ca ha atýj me gakrya ne. Ne nee ame jũm cupa to me apa nare. Ne nee acaxwýn caxwãm pê ame akrihkrit nare.

¹⁵ Jeju pê me pajõ Pahhiti na me to amji japackrea ne, ne me gĩ cunea to amji mã me hũpahti to me apa. Ne ca ha ma ate Jeju to amji mã me hajýr to meapa na, quê ha jũmjê ahna me apupu, ne ate ihkôt me cumã harên prãnte, ahna me acukij na, ca haramã me cumã harên prãam kam, me cumã harên xàa kam me cumã harên to apa. Ne amji mã aprĩa kam, amji mã me hũpahti kam, me cumã harê.

¹⁶ Ne ca ha gõtpe catyt kam, ampo pejti ton to me apa, mãr quê me acaxwãm pê ateamji kam me gapac xà kam, me amã ate me ampo kên ton nare na, me amã amji jahkre pej. Quê ha mehkwy kwý te, me ate catyt kam Jeju kôt me apa na me apupun na, quê haihtýj ame akam mencryc. Ne mehhêj xĩ xà to, cute ame ato ihkryjre prãm to, ame amãn kèanre ne. Cakrô ca ha me kam mare mã catyt kam me apa kam me to acrà, quê ha me cumã acaxwãm pê me apejti na megahkre pej, ne amji kam amehpahàm to me ipa.

¹⁷ Ne ca ha ate me ampo kèanre ton to me apa na, quê ha hahpan xà na, me ate amji pupun xà kèanre na me aton na, quê ha Pahpãm me amã:
— Hamre, atea ramã me amji kên mãme amji mên, ita na me akam ipê ihkaj na — hane. Ne

ca ha ate ame ampo pejti ton to me apa cakrô, quê ha Pahpãm te jũmjê atajê te me amã ate amji pupun xà kêanre ton na me hamãr na, mã cute ame ato kên na, quê ha Pahpãm me amã harkwa to:

— Ate me ampo to kên nare kam, cute me ato kên. Ca atÿj cumã me gũcanãr to me apa, ne nee hahpan xà na ame kam acryc nare, ita na ri imã me apejti — hane.

Pê Jeju pê me pahkritxwÿ ata hanea ne amji pupun xà kêanre to amji pupu

¹⁸ He Jeju te me acuxà, amji pupun xà kêanre to amji pupun na, ca me to amji japackre. Ne cute amji to me pahcunea kritxwÿ hiahpuro na, ca me to amji japackre. Ne hanea ne cute maPahpãm wÿr me pahto ipipkjêr prãmte, me pahkênxà itajê jahpan xà na ihtyc pyxit peaj ata na, ca me to amji japackre. Ne cupê hũmre impejti na, ca me to amji japackre. Ne cuteme pahkritxwÿ na amji ton, ne cute me papê mehkên ton catêjê mã amji jôr. Mãcute ame hĩ to kêanre, ne cama cute amji na me hamãr, mã cute mehcuran na, ca me to amji japackre. Mã Pahpãm Carô Pejti te hipêr quêt cumã hĩ tuw jôr, na quê hanee jũ caxuw hipêr ihtyc nare, ne quêt ihtĩr rohnÿtti mã na apu ipa.

¹⁹ Ne pê Jeju jĩ ty, ne nõr kwÿa kam, ma carõ mehtycarõ jacjên xà wÿr axà, ne me carõ atajê mã, cupêampo cunea jô Pahhiti na amji jarê.

²⁰ Ne me carõ itajê pê, por me panquêtti Nowe xwÿ jõ amcroa kam, pê ajco cormã pàr kre to hàpên to mõi xà ata kam, nee cute me

Pahpãmjarkwa par nare atajê carõ. Pê Pahpãm amji mã ihprĩa, ne cute jũa caxuw mehkên ton jicu, ne hÿrmã me ipipkjêr na me hikaj to ipa, mã neecute mehkên ton jicu nare. Mã me ahnaa Nowe xwÿ te pàr kreti jipêj, mãkam cute me ôjtô peaj te mehtyc xà pê me amji pytâr.

²¹ Ne cô te mehkên jipej xà pê Nowe cator ita pê, ihhêj rûm cô te me pahcumrâr xà atapyràac. Ne me pahcumrâr xà ita pê nee pahte me to amji rã pit jÿrên xà nare. Ne ihkôt harên xà te, me pahte amji kam me pajapac xà cunea pintuw, ne ihtetetti ata cwÿrjapê, cu carôt tÿjti te hacpÿa mã Jejuto ihtÿr ata kôt, catyt kam me apa.

²² Ne pê hacpÿa mã Jeju cõjkwa wÿr api, ne Pahpãm cahê na, awpôc rûm, pahhi jãmtâr jãmkrà catia krÿ xà kam jÿ. Ne jÿ ne cõjkwa kam Pahpãm mã memprarcatêjê cunea me, me cupê me hõ pahhi catêjê me, me carõ carôt tÿjti pê ajteare mã atajê cunea to ihhimpej.

4

Cu ha me pahte amji kam me pajapac xà tũm ata to me pajapac kêt

Roman 6.1-14; Epet 4.17-24; Coroxo 3.1-11

¹ Pê Jeju hÿ to amji pupun xà kêanre to amji pupu. Ca ha cuxà ate me amji pupun xà kêanre cunea caxuw ame apa. Ampo na? Quê ha jũm te hÿ to amji pupun xà kêanre to amji pupun na, quê ha nee hipêr cumã cute ampokên ton xà nõ hamreare, ne nee hipêr ihnõ ton nare.

² Cwÿrjapê, ca ha amji to me Pahpãm cajpuaw xà na, pjê ita kam, harkwa kôt, catytkam ame

apa. Ne nee hipêr ate me amji to me amji cajpuaw to prãm to, ame ampo kên ton to me apã nare.

³ Ne pê ca mam, ramã me cupê Pahpãm na mehwý nare atajê kôt, me cumã cute amji kam me hapac xà kĩnti atajê ton to ajco me apa. Ne ramã atemehkôt me ton to me iryyti.

Ne pê ca amcro atajê kam, ajco me amã me apahãm nõ xà kêanre kam, me pahpahãmti atajê ton to prãam kam, ajco me tonto me apa.

Ne ajco côxýhti to me amji to me apipãn to me apa.

Ne me gõ amji kĩn atajê kam, ahti na ajpẽn pê me aprõ caxun to me apa.

Ne meajpẽn kam mare mã, côxýhti to me akõmto me catia to me apa.

Ne ajco côjkwa kam me Pahpãm kaj na, me apãm cahac krekà atajê kĩn to ame apa.

⁴ Ne ita caxuw, ca nee hipêr me cupê Pahpãm na mehwý nare, ne mehkrã nare atajê kôt, ampo kên atajê cunea kôt ame apa prãm nare. Ita kam ri hãn ne me amã:

— Pýhàpà, xãmte ca nee hipêr me ikôt me amjton to prãm nare — hane. Jirô pê mã ri, cute mehwý mã me axũn xà kêanre to, me akôt harẽn.

⁵ Ne quê ha ihtýj jũ caxuw, mehkêanre itajê na Pahpãm mã me amji kôt harẽ. Ne quê ha Pahpãm pê mehcukij ne ajpẽn pê me to haprãr catê ata ihtýj mempejti xà wýr mempej to haprã, ne mehkên xà wýr mehkên to haprã. Ne ramã

cute mehtyc me, mehtĩr itajê jipôc ri ajpẽn pê mempej to haprãr xàa kam ri ramã jỹ.

⁶ Cwýrjapê ri, por ramã mehkên tyc atajê teJeju pê me pahpytãr catê na, me harẽn par. Mãr quê xwý mã mehkên mã hikra, ne catyt kamme ipa. Mãr quê Pahpãm hacpỹa mã mehtĩr na me to, quê mehtĩr, ne cahê na me ipa rohnýtti mã.

Cu ha pahte amji jahkre pej krã kreti to me Pahpãm mã me apê

Roman 12.6-8

⁷ Quê ha ahtũm nare, quê ha ampo cunea jamre xà kam ahtwý. Cwýrjapê ca ha me guphêa rũm, caxwãm catia mã, catyt kam me apa, mãr ca catytkam Pahpãm mã me acakôc.

⁸ Mãr quê ha ampo itajê cunea jirôa pê, me amãajpẽn kĩn catia to cati, mãr ca cute ame ato kên atajê to me cumã tojnõ, ne me hicu.

⁹ Ne me apê ikre jõ pahhi atajê, quê jũa rũm me akwý gũrkwa kam me ana cuprõ, ca atýj me ahna amji to pôj, ne me cumã harte, ne me acahê na mehkrĩ, ca me hamã, ne nee amehkôt harẽn nare.

¹⁰ Ne pê Pahpãm ahpỹanre na, ajteare mã, me pamã pahte amji jahkre pej krã kreti jõr pa, ne ahna me pahpyxwýr pa. Cwýrjapê ca ha, cute me amã, ate amji kam me gapac xà jõr xà atajê jamãr peaj, ne ate me to me akwý to impejti xà caxuw, ca ha me to apa.

¹¹ Quê ha Pahpãm te, jũm te me cumã harkwa jarẽn xà caxuw, cumã amji jahkre pej krã kreti jõr na, quê ha ihtýj me cumã Pahpãm jarkwa jarẽnto ipa. Quê ha Pahpãm te, cute mehtehcajpar xà caxuw cumã amji jahkre pej

krã kretijôr na, quê ha ihtÿj Pahpãm carôat to mehtehcajpar to ipa. Hõ, ca ha me hajÿr to me apa, mâr quê mehcunea me apupu atajê, me Pahpãm jarên pejti jarên to:

— Inxũ Cati, apê me ijõ Pahhiti pê Jeju Crixto Pãmpeaj — hane. Quê ha mehcunea me Jeju carôt cati tÿjti rohnÿtti mã na me hahkre pej. Ampeaj kam!

Cu ha pahtÿj Pahpãm te pahte me amji pupun xà na me pahton na me awcanã

Ruc 6.20-23; Jowãw 16.1-4; 2 Texarõn 1.3-12; Tijac 1.2-4

¹² Imã me ikwÿ nõ kïnti atajê, me apê wakÿre prà tepti pê ôr ata pyrãac na, ca amji to me amji japackre. Ne pom hãn ne me wakÿre prà tepti pupun pej prãmte, cuhy kam me cunõ, ita na mã me ate. Ita jïkjê na mã, Pahpãm ma ate me amji pupun xà kêanre kam me apa na me gamã, cute me amã ihkïn name ato ipipê prãmte. Ýhÿ, Pahpãm mehkra cunea to hajÿr to ipa. Cwÿrjapê, ca ha nee me ajpën mã:

— Pom me papê Pahpãm tekjê ita? Mã cu ajte pahtÿj me amji pupun xàkêanre to me amji pupun to me papa? — hajÿr nare.

¹³ Ca ha me amji pupun xà kêanre to me apa ata pyrên me gakrya ne. Ampo na? He ca Jeju me, ate me amji pupun xà kên atajê to ate me apipëan. Cwÿrjapê, ca ha jũ caxuw Jeju carôt jãhcujrohti impejti te amji to ipipê xà ata jõ amcro kam, ca ha me amã amji kïan ne.

¹⁴ Ne me apê Jeju tekjê, na ri ame axũnto me ipa. Cwÿrjapê ca ha me amã amji kïanne. Ampo

na? He ate amji kam me gapac xà itajê, ihtỳj me akam Pahpãm Carõ Pejti carõt tỳjti te ihkrĩ na, me garẽ.

Cu ha nee jũ caxuw ampo kên ton to me papa nare

¹⁵ Ca ha nee jũ caxuw jũm curan nare, ne nee ampo to me gàhkĩj nare, ne nee me gõ pjê jõ pahhi jarkwa jirô pê me apỳpỳm nare, ne nee ate me ampo kên ton catêjê te amji kam me hapac xà mã, atỳj ame acjêj to meapa nare. Ampo na? He imã ampo itajê cunea jahpan xà na, me ate me amji kên mã me amji rẽn, ne kam me pahpahàmti nõ to ate me amji pupun na, imã me ato prãm nare.

¹⁶ Ne quê ha jũm me apê Jeju tekjê itacwỳrjapê, ate me amji pupun xàkêanre na me ato, ca ha nee amji jũ na ame apahàm nare, ne ampeaj kam cama me apê Jeju tekjê pyrên me gakryti na, Pahpãm mã me amji jarẽ.

¹⁷ Ne ramã Pahpãm te mehcukij ne ajpẽn pê me to haprãr xàa kam ri jỹ, ne toa ri jỹ. Ne cute ramã mam me papê me hõ tekjê kam to tẽm, ne pahte ame to ihcupan jahpan xàna, ame pahto kên pa. Jirô pê mã, quê ha, cute Jeju pê me pahkên pê me pahpytãr catê na, harẽn pejti atajê to amji mã me hajỹr nare atajê, quê ha me pajirôa pê mehkên catia mã me irẽn kam tẽ.

¹⁸ Ne pê ramã Xarômãw xwỳ Pahpãm jõ kàhhôc kam, ita na ihhôc to hane he:

“Mempejti catêjê te mehkên cati pê me amji pytãr xà wỳr,

quê ha xa me amji pupun xà kêanre to me amji pupun cri.

Jirô pê mã quê ha mehkêanrecatêjê ma amji tête ame Pahpãm curê,

na quê ha ihtÿj me amji pupun xà kêanre to me amji pupun to me ipa rohnÿtti mã” hane.

¹⁹ Měr hõhõ, me pahkwÿ kwÿ te me amjipupun xà kêanre to me amji pupun xàita na ri, me Pahpãm te me to tojnõ. Cakrô quê ha ihtÿj me Pahton Catê, cute me pahkên pê me pahpytâr to ihcakôc xà ata na, amji to amji japackre. Na cu ha pahtÿj itajê cunea na amji mã me to hane, neampo pejti ton kam me to pancrà tu ne.

5

Cu ha me pahtÿj Jeju na mehkwy jamâr peaj ne

¹ Ipê Petrô, ne ite hajÿar ne ipê Jeju na mehkwy to mehhimpej catêjê nõ. Nepê wa ito jĩa to Jeju te amji pupun xà kêanre na hõmpu, pê ikam mare mã ty. Na wa itÿj mehcunea mã ihtyc xà ita na harẽn to ipa. Ne quê ha jũcaxuw amcro nõ na, Pahpãm te mehcunea mã Jeju catia to cati na to ipipê xà ata kam, quê ha cume ajkaam me ito ajpê. Na wa ha ita caxuw me apê megõ krĩ kam me hapackre catêjê na ahwÿ, ne me gapackre.

² He me apê carà cahàcre hõhti jamâr catêjê pyràac. Mã Pahpãm te me amã mehkwy pê me hõ tekjê atajê jõr, ne apê me hamâr catêjê name apyxwÿr, cwÿrjapê ca ha me hamâr prãam kam me hamã. Hõ, ate me to hajÿr xàita na ri, Pahpãm mã me ato prãm. Ca hanee me amã me

hamãr prãm narekam, ame hamãr nare, ne quêt amã mehamãr prãm kam ma me hamã. Ne nee ate me ihpore nõ pyr prãmte, ame hamãr nare.

³ Ne nee ca ate me to ahimpejxà ata kam gâprêa kam ame to ahimpej nare. Nequêt cute akôt me ipa to prãmti xà caxuw, ca ha catyt kam, ate amji kam me gapac xà impejti to me apa.

⁴ Ne Jeju pê carà cahàcre jamãr catêjê cunea jõ pahhi pyrâac, na ca ha atÿj cumã me apê. Ne quê ha jũ caxuw amji jaxà, ne ihtÿj ate megâpên xà ton atajê jahpan xà na, me amã amgõ. Ne cute me amã hãmjõr xà ata pê pahhi krãhkà impejti. Ne pahhi krãhkà impejti ata pê jũ caxuw hahĩ xà jamre xà nare ata, quê ha me amãcugõ. Quê ha mehcunea me apê Pahpãm mã me hàpên catêjê impej na megõmpu ne ate me gâpên xà jipêj na me gahkre pej.

Cu ha nee me pahkwÿ jirôa pê amji to me pahcati to prãm nare

Ruc 18.9-14; Tÿjac 4.7; 1 Petrô 1.6-9

⁵ Ne ita caxuw wa ha hanea ne me gĩ tÿj tuwtiitajê japackre. Ca ha atÿj amji caxuw mehwej te me hapackre catêjê atajê kampa. Ne ca ha me acunea pêPahpãm na mehwÿ atajê, me amji to me acati prãm nare kam, atÿj me ajpên tehcajpar to me apa. Ne pê ramã Xarômãw xwÿ Pahpãm jarkwa kôt, hõ kàhhôc kam ita na, ihhóc to hane he:

“He Pahpãm ihtÿj, por cute amji to me cati prãmti atajê cuna mã ahtwÿ, ne intête me hiprõ.

Nepor amji to me cati prãm nare atajê ri, ihtÿj quêt cute mehtehcajpar xà” hane.

⁶ Na ca ha Pahpãm carôt pahtÿjti ata krac ri, amji to ame acati prãm nare to ame apa. Mâr quêt ihtÿj jÿ caxuw, hõ amcro kam hàhhuc xà atakam, ato acati ne ato acarôt tÿjti ne.

Pahpãm ihtÿj me pajamãr to ipa

⁷ Ne nee ca ate ampo to amji kam me gapac xà ata to ame amji mã me akrihkrit krÿn nare. Ampo na? He Pahpãm ri, ma ate me amji kam me gapac xà itajê mea mã, me gamãr to ipa.

Me pahcurê xwÿn pê Xatanaj ata pê roptycti pyrãac

⁸ He me pahcurê xwÿn pê Xatanaj pê roptyctia, ne cute jÿm krêr prãmte, ihtÿj apu carôrô to ipa ata pyrãac. Ita jÿkjê na mã ihtÿj Xatanaj me papu na apuipa, cute Jeju to pahte amji mã me pahhimpej xà ata to me papê hamre prãmte. Cwÿrjapê ca ha me guphêa rÿm, caxwãm catia mã, catyt kam me apa.

⁹ Ne Jeju kam me pahkjêjê atajê te me acuxà pjê cunea kam, ame amji pupun xà kêanre toame amji pupun na, ca me to amji japackre. Ne nee ca Jeju to ate amji mã me ahimpej xà ita jicu nare. Ne nee caame Xatanaj te ame ato kên kryjre atajê cupa nare. Ne cama quêt cuna mã me ahtwÿ, ne cute me ato hajÿr têtê me hiprô.

Cu ha pahte me amji pupun xà kêanre ita nee me pahto irÿyti nare

10 Pahpãm mã me pahkĩn, ne cumã me pahcaprĩ, mã cute Jeju Crixto kam pahte me ajpẽn hõnco tu xà caxuw, cute me pahna hàhwỳr. Mår cu mepahcunea ajpẽn kam, imej catihti ata kam, ame papa rohnýtti mã. Ne ate me amji pupun xà kêanre ita, quê ha nee me ato hãm ryyti nare. Ne quê haPahpãm me gũcanår xà caxuw, me amã carõt gõ, ne me ato imej, ne ihtỳj me ate amji kam me gapac xà imejti kam me apa na, me atehcajpar to ipa. Mår ca nee jũ caxuw Jeju to amji mã me ahimej jicu nare.

11 Pahpãm mã mehcunea jirõa pê carõt pahtỳjti rohnýtti mã. Ampeaj kam!

Cu ha Pahpãm mã me pahkĩnti ita na amji mã me to hajỳr rohnýtti mã

12 Ỡhỹ me ikjêjê, wa ite me amã ihkàhhôc crire ita ton xà na, Xira te itehcajpar. Ne cupê me pahkjê, ne pahtỳj pahte amji mã me to hajỳrxà ata mã he. Wa ite me amã Pahpãm mã me pahkĩnti na harẽn xà ita to, me amã me acarõt to ihtỳj prãmte, wa ite me amã ahna ihhôc. Na ca haatỳj me Pahpãm mã me pahkĩnti ita na amji mã me to hajỳr rohnýtti mã.

13 Ne pê Pahpãm amji mã Jeju na mehkwy capì, mãita rì Papirõn jõ krĩ kam ame ipa itajê te me amã amji jarẽn kujahêc. Ne hanea ne Macô, pê ikracahàhhàc ita te me amã amji jarẽn kujahêc.

14 Ne ca ha me amã ajpẽn kĩnti kam, ame ajpẽn japỳ. Ne imã me apê Jeju tekjê catêjê cunea te me acaxwãm pê me acarĩcti kam, me amã ampo cupa nare na, me ato prãm.

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a